

10/05/1997

Laos tidak mahu rakyat terus miskin

LAOS, antara negara termiskin di dunia, menaruh segunung harapan diterima sebagai anggota penuh Asean, Julai ini. Demikian rumusan wawancara wartawan DUNIA, Noreha Mohd Ripin dengan dutanya ke Malaysia, Bounthong Vongsaly minggu lalu. Ikuti harapan diplomat ini seperti diluahkan dalam temu bual itu.

BERBEKALKAN kepercayaan dan keyakinan semangat setiakawan serantau, Laos mempertaruhkan nasib dan masa depan rakyatnya di tangan tujuh anggota Asean ketika ini untuk keluar daripada belunggu kemiskinan dan senarai negara paling tidak membangun di dunia.

Menurut Bounthong, Laos turut menyimpan tekad dan merangka wawasan meneladani Wawasan 2020 yang diilhamkan oleh Perdana Menteri, Datuk Seri Dr Mahathir Mohamad, untuk membawa Vientiane keluar daripada senarai negara paling tidak membangun di dunia.

"Kita perlu belajar lebih banyak daripada Malaysia. Malaysia dapat menawarkan banyak perkara daripada pengalamannya. Malaysia cukup terkenal di peringkat forum serantau dan antarabangsa.

"Selain Malaysia, kita juga belajar daripada negara jiran seperti Thailand, Vietnam dan negara anggota Asean lain," katanya.

Menurutnya, beliau percaya hubungan dengan Malaysia mahu pun negara Asean lain akan meningkat selepas negaranya menyertai pertubuhan itu pada Julai ini.

"Asean adalah pertubuhan yang mampu menyusun strategi untuk sama-sama membangun, memaju dan berkongsi sumber yang ada untuk melahirkan sebuah rantau yang bersatu dan disegani," katanya.

Beliau berkata, Asean mahu membawa tiga lagi negara Asia Tenggara - Myanmar, Laos dan Kemboja - dalam pertubuhan itu supaya lahir sebuah rantau yang kukuh dan melangkah satu hati, satu suara.